

晚

晴

移

詩

匯

晚晴簃詩匯卷二十九目錄

王士禎 一百五首

晚晴移詩匯卷二十九

徐世昌

王士禎字貽上號阮亭又號漁洋山人山東新城人順治戊戌進士授揚州推官行取禮部員外郎改翰林院侍講官至刑部尙書諡文簡有漁洋蜀道蠶尾南海雍益等集合爲帶經堂集

施愚山曰阮亭先生論詩於其鄉不尸祝于鱗於唐
人亦不踵襲子美舉體遙雋興寄超逸殆得三唐之
秀而上溯晉魏旁採齊梁者徐健庵曰先生之詩
擇一字焉必精出一辭焉必潔雖持論廣大兼取南
北宋元明諸家而選練矜慎仍少陵夔州以後詩不
寶崖日蠶尾續集風格高曩如少陵夔州以後詩不
煩繩削而自合而清遠蕭淡仍自陶韋門庭中來信
乎捨筏登岸時也翁覃溪曰先生詩當時有謂祧
唐祖宋者固非其謂專主唐音者亦有未盡謂師韋
柳似矣顧何以選三昧集不及韋柳謂具體右丞似
矣又何以鈔五言詩不及右丞是皆未足盡之也或
曰讀先生詩當熟史記漢書故惠氏金氏徐氏諸箋

說援據極博而尚有補注者然舉司空表聖殿滄浪
言詩之旨歸於妙悟又若不假注釋者此皆仁智各
見吾惡乎執一以求之又曰先生以詩學沾溉後
賢顧後來受其膏馥者或往往厭薄先生蓋始於趙
秋谷後人所聞不逮秋谷者亦轉效之實則先生言
詩窺見古人精詣誠所謂詞場祖述江河萬古者矣
詩話文簡生當國家全盛之時文教昌明之會特擢
清職曠典易名皆由於詩故世奉為山斗詩承明王
李鍾譚之後獨標神韻為宗旨蓋用以調劑矯正之
後來詩異同者遂成門戶然公詩於精能中見神韻
非專事蹈虛者詩本於性情出於才分非盡關
於學以詩學論要不得不推為一代正宗也

擬美女篇

洛濱風日好美女出相望瑤象飾香轂玉軼鳴鏘鏘采春
蘭阪上彈蓋蘅皋傍龍輔節纖步鶯珠結明璫借問女誰
氏少小生平陽大姊入後宮次姊瑯琊王小妹雖不貴夫
婿直東廂出入冠駿驕天子侍中郎檻衣萬錦費腰褭千
金裝容華誠自惜貴盛甯易詳洛水正微波明瀾一何長

川路西南永扁舟不可方寄語盛年子顧義慎自防

擬白馬篇

駿馬生代北少年出幽并結束各光采指顧風雲生朝游
屬玉觀夕宿衛承明身逐孤兒隊名隸羽林兵行行南山
獵意氣何縱橫蒼隼決雲來飛矢逆風鳴大澤鵲鳴迢深
雪狐兔驚迴瞻鶴雀門突兀與雲平鞍馬倏來歸勢若浮
煙輕昨夜羽書至貳師出邊庭上馬別妻子鳴鏑追前旌
舊隨冠軍伍復此河源行大漠少行人深谷多鼪鼯朝飲
沙上泉夕戍雲間城左顧疏勒服右盼伊吾清無令都護
將關外獨聲名

醴泉寺高閣瞻眺有懷范文正公

風雨湖上來蕭條灑飛閣殷雷起眉際極目窮寥廓遙天

壓煙水空濛氣磅礴大澤盤蛟龍斜風偃鵬鶚卻眺鴻濛
中日光遠迴錯草木暗四山急淙鳴萬壑悵然思古人大
雅何時作

蠡勺亭觀海

登高邱而望遠海坐見萬里之波濤長天寥廓雲景異春
陰偃蹇魚龍高怒潮乘風立千丈虎蛟水兕紛騰逃羣靈
潛結萬蜃氣一痕未沒三山椒須與勢盡潮亦止波淡天
清靜如綺菱苔沈綠紛塘坳螺蚌搖光散沙泖參差島嶼
羅殊域紛如星宿秋天裏擊我劍聽君歌有酒不飲當奈
何日主祠前水蕭瑟仙人臺上雲嵯峨羨門高誓不可見
秦皇漢武空經過祇今指顧傷懷抱黃腫輓餅盡荒草人
生快意無幾時明鏡朱顏豈長好吾將避世女姑山不然

垂釣蜉蝣島

周文矩莊子說劍圖

後有董宗伯
書說劍篇

古今人物畫手誰第一晉有衛協吳曹興南唐周生更奇
雋行筆瘦掣姿峻嶒此圖在世踰千載墨光黯淡生光晶
君王隱逸各有態蠶絲煙篆交迴縈目暝鬢突五劍客短
後之衣曼胡纓二人旁立目左顧劍如星日光縱橫昂首
右顧者三士二人按鐔神欲生一人拔劍作虎步怒如截
兕吞長鯨使筆如劍劍氣出此公無乃能鐵兵莊生說劍
固豪快十步千里無留行千年奇論佐奇筆揮毫潑墨皆
飛鳴雲間墨妙更邁絕鍾王腕底紛鬪爭自云昔見吳興
書說劍恨不作圖雙妙并今逢此卷信神物又恨作書非
趙卿徘徊三歎出金石煥然妙蹟如神明我聞周生妙得

後主作字法秋胡謝女風格清秦淮花月汴京土感此傷
人今古情

秋柳

秋來何處最銷魂殘照西風白下門他日差池春燕影祇
今憔悴晚煙痕愁生陌上黃鸝曲夢遠江南烏夜村莫聽
臨風三弄笛玉關哀怨總難論

娟娟涼露欲爲霜萬縷千條拂玉塘浦裏青荷中婦鏡江
干黃竹女兒箱空憐板渚隋隄水不見瑯琊大道王若過
洛陽風景地含情重問永豐坊

東風作絮糝春衣太息蕭條景物非扶荔宮中花事盡靈
和殿裏昔人稀相逢南雁皆愁侶好語西烏莫夜飛往日
風流問枚叔梁園回首素心違

桃根桃葉鎮相憐。眺盡平蕪欲化煙。秋色向人猶旖旎，春
闈曾與致纏綿。新愁帝子悲今日，舊事公孫憶往年。記否
青門珠絡鼓松枝，相映夕陽邊。

洗象行

水關蒼蒼柳陰碧，寶馬流蘇紛絡繹。日中傳呼洗象來，玉
河波射珊瑚赤。須臾鉦鼓千雲霄，萬夫聲寂如秋宵。虎毛
蠻奴踞象頂，邱山不動何岩巖。巖岸邊突兀二十四，直下波
濤若崩墜。縱橫欲蹴鼉鼉宅，騰踏還成鵝鵝隊。乍如昆明
習鬪戰，萬乘旌旗眼中見。又如列陣昆陽城，雷雨行天神
鬼驚。奴子胡旋氣道壯，忽沒中流狎巨浪。撇波一躍萬人
呼，幡然卻出層霄上。今年丞相收夜郎，扶南盤況舊王章。
遣隨方物貢天闕，屹然立仗金階旁。聖朝自不貴異物，致

此亦足威遐荒黃門鼓吹幕復動海立山移浩呼洵大秦
獅子多威神山林豈是天家珍

余澹心寄金陵詠懷古蹟詩卻寄

千古秦淮水東流繞舊京江南戎馬後愁殺庾蘭成
鍾阜蔣侯祠青溪江令宅傳得石城詩腸斷燕城客

再過露筋祠

翠羽明璫尙儼然湖雲祠樹碧於煙行人繫纜月初墮門
外野風開白蓮

雨後觀音門渡江

飽挂輕帆趁暮晴寒江依約落潮平吳山帶雨參差沒楚
火沿流次第生名士尙傳麾扇渡踏歌終怨石頭城南朝
無限傷心史惆悵秦淮玉笛聲

曉雨復登燕子磯絕頂

岷濤萬里望中收振策危磯最上頭吳楚青蒼分極浦江
山平遠入新秋永嘉南渡人皆盡建業西風水自流灑酒
重悲天塹險浴鳧飛燕滿汀洲

吳季子祠下作

我行延陵城懷古心苑結讓德邈已遠流風緬曩哲州來
季當立高懷甯詎屑躬耕表遐志亮哉子臧節慕義永無
窮穹碑字難滅所悲於潛役國亂相更迭伍胥進勇士專
諸踐王血遜位固高義復命忍臣列春秋不名賢書札理
當嘶嗚呼三代後斯風久淪絕廉節起頑懦尙論義常竊
縞紵思古人空祠颯寒雪

五人墓

流連虎阜游宛轉山塘路石門映迴波英靈此中聚滿壇
松桂陰落日青楓樹生傍伍胥潮死近要離墓千秋忠介
墳鬼雄誓相赴酌酒拂蒼碑寒鴉自來去

自米堆山下行至上陽村錢家礪望湖中漁洋法華

諸山

杖策信忘疲行行畫圖裏崎嶇下雲壑蒼茫望煙水石徑
何盤紆疏籬照梅蕊寥落重湖濱柴門數家市居人太古
風但解數雞豕語我種植法敦樸有奇理雖非角里儔頗
謂桃源比逶迤到湖湄浩渺歎觀止震澤控三江波瀾此
方始法華表東陲漁洋正相似煙雨春空濛峯巒暮俶詭
昨朝梵天閣遠眺如隱几豈知方丈山忽落芒屨底欲乞
五湖長垂釣將已矣

和牧翁題沈明倩石崖秋柳小景

宮柳煙含六代愁，絲絲畏見冶城秋。
無情畫裏逢搖落，一夜西風滿石頭。

秦淮雜詩

新歌細字寫冰紈，小部君王帶笑看。
千載秦淮鳴咽水，應仍恨孔都官。

舊院風流數頓揚，梨園往事淚沾裳。
樽前白髮談天寶，零落人間脫十孃。

傳壽清歌沙嫩簫，紅牙紫玉夜相邀。
而今明月空如水，不見青溪長板橋。

新月高高夜漏分，棗花簾子水沈薰。
石橋巷口諸年少，解唱當年白練裙。

故中山西園

上公邸第舊西園水石蕭然絕世喧無復秋蘭被長坂祇
餘修竹映朱門蕭曹事業終歸盡江孔文章莫更論日暮
風煙愁客思冶城南是謝公墩

瓦官寺

江色斜陽下來過古瓦官勇如驃騎少癡似虎頭難梵響
流空寂松聲覆殿寒逍遙能解否試問道林看

答朱錫鬯過廣陵見懷之作時謁曹侍郎於雲中

桃葉渡頭秋雨繁喜君書札到黃昏銀濤白馬來胥口破
帽疲驢出雁門江左清華惟汝在文章流別幾人存曹公
橫槩懸相待共醉飛狐雪夜尊

昭陽顧符植畫便面棧道圖歌

顧生畫學李思訓
尤工棧道兼騾綱
丹青金碧妙銖黍
近形遠勢窮毫芒
褻斜山色一千里
子規啼處煙蒼蒼
女郎祠邊人跡絕
但見哀猿連臂叫
嘯青崖旁江水如
油下南鄭閣道似
髮通陳倉紅氍毹
裹背笠覆首人物
結束疑唐裝車馬
班班入雲際如蟻
緣垤相扶將秦川
渭水望不到蠶叢
直上天茫茫仰家
扇子冰雪色一莖
斑竹磨瀟湘如何
方寸懷袖裏宛然
置我蜀道青天長
揚一益二古天險
譙周鬻國謀非臧
阿瞞四紀作天子
青騾西幸何倉皇
三十年來蜀道塞
況從古史論興亡
因君妙蹟發遙慨
如聽鈴聲替戾岡

送陶季之潞州

先生昔日登武夷
鐵船峯頭看奕棋
中冠離支三百顆
酒

酣自擘輕紅肌峯頭爛睡忘甲子坐笑曾孫生白髭張帆
伐鼓下黃鶴欲濫三湘窮九疑披襟蘭臺發高唱快哉不
辨風雄雌平生名岳屐齒徧風塵京雒嗟衣綈投我奇文
浩千頃蛟龍大澤纏躩踞謂我四海一知己譬若莊休從
惠施高齋茗飲坐清晝風鑪活火分槍旗我時無事似犀
首酒鱗浮動銀留翠豐臺紅藥花照眼驪駒忽告將西馳
壯心猶作驥伏櫪適志無如泥曳龜我聞上黨天下脊當
年潛邸傳臨淄飛龍荒宮沒煙莽斷碣髣髴開元詞紛紛
梁晉夾河戰鴟兒萬騎陳軍麾錦囊負矢盛意氣歌聲慷慨
留三垂時平不用弓箭手空老昭義千熊羆戰場下馬
問亭長鬼燐颯颯寒飈吹君家草堂臨射陂門前五柳藏
東籬何時單舸徑歸去北窗高枕談黃義

膠東張雉畫葛洪移家圖歌

下簾卧清晝遠夢生羅浮覺來北堂上素練橫滄州依稀
三萬六千丈風吹絕壑紅泉流何人攜持雜負戴全家避
地來山幽先生身騎烏犢牛丹雞白犬隨行輒鮑家小女
兩丫髻手把芙蓉居上頭惠懷之際那可道萬乘不洗金
塘羞王家甯馨失三窟華亭鶴唳悲清秋回首銅駝洛陽
陌名士對泣新亭囚伏波將軍不受賞丹沙欲就來交州
大鵬詎可伍鷓鴣跛鼈坐笑追驂駟張生妙筆擅黔陬令
我逸興生丹邱夙昔讀書慕仙意望而不見中心愁十年
婚嫁願粗畢青鞵快作逍遙游刀圭爲我留并竈此生未
作坳堂舟

世祖章皇帝御畫渡水牛戲以指上螺紋成之賜中官某

臣從黃州通判臣宋犖得觀恭賦一章

章皇握乾符武功燁旁魄乎齋春晝長游藝睠圖籍泉壑
窮窈窕煙雲羅幽曠寶繪賜近臣往往等球璧常從青箱
堂奎藻觀赫奕營邱及河陽到眼堪一擲想見憂勤暇勝
情寄山澤戲作渡水牛生態妙盤辟肉怒垂星圖筋突陰
虹直脰似滿黃鍾角堪扣白石彈指九牛毛森疏如刻畫
水波稍演迤浮鼻未沒脊髣髴綠楊風掩映春蕪碧神武
十八載文教洽重譯干戈與弓矢包用黃牛革小雅賡宣
王爾牛何濕濕旒旌牧人夢考牧周官職應知翰墨餘與
世登衽席龍髯去已遠謳思徧荒僻雲漢爛天章典謨布
方策聖主念紹庭率由正無射小臣沐皇風流涕記飛白
送宋牧仲別駕歸黃州

詞賦梁園憶勝游一麾雲夢澤南州三分誰似周郎少九
辨深知宋玉愁烏鵲南飛河漢轉大江東去古今流山川
如此容高嘯羨汝黃泥坂下丹

送陳其年歸宜興

與君五載揚州夢細馬吟春阜莢橋歲晚幽州復相送九
門風雪壓盤鵬

送客魂銷楓樹林買田陽羨舊同心花枝照眼鰕籠嘴未
得從君弄渚禽

送吳天章歸中條

二月春蕪綠紛紛蝴蝶飛花朝逢暮雨寒食減征衣道路
誰知己登臨不當歸中條多水竹此去掩荆扉

愛汝王官谷他年擬借居三峯當戶牖五姓足樵漁田舍

堪懷古茅茨宜讀書獨憐好身手歸去注蟲魚

題尤展成新樂府

南苑西風御水流殿前無復按梁州飄零法曲人間徧誰
付當年菊部頭

猿臂丁年出塞行灞陵醉尉莫相輕旗亭被酒何人識射
虎將軍右北平

千金匕首土花斑兒女恩讎事等閒他日與君論劍術要
離豕畔買青山

題施愚山賣船詩後

國家急廉吏將以風百僚如何十年來吏道紛吳敖哀哉
此下民鞭朴分安逃魯山與陽城斯人竟難招江西飽亂
離白骨填蓬蒿石田廢不治遺黎雜山魃一二老寡妻號

勞困征徭昔者數守令爲政嚴風颭峻令盛誅求細不遺
毗鄰金玉競輦致樂哉共宣驕憲府前上壽鞠脰一何勞
公堂侮下民意氣一何豪寡妻哭向天血淚埋荒郊亂後
幾子遺乃以資汝曹是時宛陵公持節吉臨交爲政貴簡
易潔己先清脩放衙苔蘚淨飛鳥營其巢賦詩彈子嶺慷慨
同石壕白鹿與青牛斯道誰鼓蘘公獨奮百世皋比陳
唐堯廉恥存網維義利窮毫毛蘭芷變荆棘孔鸞革鷗鳥
汝曹卽不仁甯終肆闕虢七載一舸歸無物充官艘兩部
萬黔首留公但號咷讀公賣船詩中心何忉忉填膺抒此
詞庶以備風謠他年韋丹碑會見留江皋翹首望宇中煙
火尙蕭條安得百施公爲時激頑澆

送張箕山學士歸廬陵

迴首觚稜別紫宸孤舟遙下富川濱誰令江外漁樵侶爭
識先皇侍從臣上殿似聞辛慶忌行吟休擬楚靈均千秋
公議存青史應爲朝廷惜此人

觀祕魔崖至龍潭作

山行逐藥若徑轉無人跡亭午踰高嶺逍遙隨所適古寺
披荒榛乍到如有獲盧師晏坐處猶存澗邊石石上留孤
松終古不盈尺地僻山鬼鄰鳥下蒼苔積孤閣臨寒溪林
壑莽蕭槭灌木紛相糾陰崖互崩拆何當秋雨時驚湍若
潮汐來此十日眠濯足蛟龍宅

卧佛寺

清晨越南磻畢景來東林石徑入幽闌稍聞鐘磬音禪房
鳴腳古別院杪欒陰春夕月復佳微雲滅遙岑山氣自蒼

鬱天宇亦森沈道人澹相對松風灑衣襟夙懷清淨退因
識妙明心寂寥無可說請君張玉琴

晚入退谷卻寄孫北海先生

谷口遠煙暝水石起寒色西溪有歸人東峯隱餘日積雪
封巉巖微徑雪中出殘冰流復斷暗泉聽還失不知荒寒
中前峯去安極稍見殼鯨牛悵望歸飛翼侍郎昔挂冠於
此散愁疾畫壁滄洲圖結屋雲林側溪南萬竿竹歲久漸
蒙密爲述淨名意更就支公室慙歎解巾非何年此棲息
故明景帝陵懷古

金山南臨裂帛湖荒陵十里鴈鷗呼奪門事往二百載行
人過此猶歛歔紅牆剝盡古瓦落莓苔溜雨生銅鋪老松
離立色枯槁但穴蟲蟻餘根株菰塗龍輻禮本殺矧乃劫

火經樵蘇咫尺天壽雲氣接抔土獨葬西山隅洪宣老臣
稍凋喪國成一旦歸刑餘勃鞞之問史所貶詎有宦寺千
征誅黃沙慘澹鼓聲死萬乘一擲成纍俘國有君矣社稷
重孫申謀鄭無差殊白登城南翠華返錢塘司馬功難誣
紛紛南渡議和戰乃知計左非良圖全寅之占信奇中朝
衣東市嗟何辜劍南歸來西內閉唐家父子輪廐奴處人
骨肉事非易子臧季札今則無功罪千秋有特筆九鼎一
髮須人扶謚同泉鳩理太酷紀年猶幸無革除裁令流水
良亦足甯論玉匣還珠襦欲落不落夕陽下弔古且復留
斯須殘碑滅沒牛礪角石纓橫卧蒼髯鬚君臣一代盡宿
草雍門太息當何如

雨中度故關

危樓飛流萬仞山
戍樓遙指暮雲間
西風忽送蕭蕭雨
滿路槐花出故關

國士橋

國士橋邊水
千年恨未窮
如聞柱厲叔
死報莒敖公

河中感懷寄諸兄

何處依依動客愁
蒲津雲物迥高秋
河聲近挾中條雨
關勢遙分太華旒
人代茫茫雙去鳥
夕陽渺渺獨歸舟
京華故國俱千里
心折西風鶴雀樓

望華山

關中八水匯清渭
獨朝宗黃河西北來
交會船司空
河流挾底柱
岳勢分宏農
山河兩戒首
氣壓穀函東
金天正肅殺
屹然白帝宮
削成五千仞
真宰散鴻濛
及關見岌嶮
元

精羅心胸倏忽雲氣生西接終南峯諸峯忽已失俯首趨
河潼峨峨司寇冠獨立青雲中蒼茫望三輔秋氣去安窮
荒唐秦皇臘寂寞希夷蹤何當駕白鹿還共驂茅龍

華州齊雲樓

齊雲樓上望京師渭水東流無盡時父老尙傳行幸日教
坊曾譜斷腸詞城空只見雙飛燕劫敗猶爭一局碁莫問
寒煙十六宅土花凝碧至今悲

漢武帝通天臺址

通天臺畔望咸京秋入秦川雨半晴御宿不來仙掌散官
車已往露盤傾神光遙指虛無影渭水長流日夜聲此去
西風茂陵路祇應腸斷沈初明

武功道中

武功回首望金城古跡蕭條感乍生
禿節尙憐蘇屬國黨人終賴寶游平
白頭鬱鬱身前事青史悠悠世上名
千里終南山色好一枝筇竹萬緣輕

馬伏波祠

冥冥炎海伏波祠肅肅靈旗故國思
萬里功名銅馬式五溪淫潦跼時隗
囂詎識眞王異朱勃終慙地下知空
憶平生少游語歸來款段悔教遲

鳳嶺

南岐地何高鳳嶺踞其右路絕無鉤
梯直上若懸溜日月互蔽虧光明錯
昏晝雲霧四蕩潏雷車中雜糅飛龍
何衙衙天矯出巖竇俯瞰雨當水奔
流下騰湊轉石類搏擲畫沙成篆籀
初疑飢蛟蟠更作外蛇鬪聞昔周文
王盛德及

靈囿鳳鳥此來集世遠事悠謬末季重邊防戎馬幾馳驟
秋風吹散關一夕驚老瘦

五丁峽

南窮石牛道巖巖下雲棧三日招我魂足踔目猶眩豈知
東蒼州耳目益奇變始過金牛驛繆嶠已凌亂漾水從北
來劣足泛鳧雁舉頭嶓冢山峨冠倚天半大哉神禹功從
此導江漢漸入五丁峽譎詭駭聞見斗壁何獐獐十萬磨
大劍攢羅列交戟茫昧通一綫亂水殷峽中蛟蜃喜瀾汗
仰眺絕圭景俯聆競雷斗九鼎鑄神姦到此百憂患東方
牧犢兒竟使蠶叢判我行忽萬里風土異鄉縣身落大荒
西終賴皇天眷咄咄復何言艱虞一身賤

金方伯邀泛浣花溪

解纜江村外溪沙失舊痕夕陽來灌口秋水下彭門清吹
臨風緩神鴉得食喧百花潭上好新月破黃昏

長壽縣弔雪菴和尚

枳縣秋風愴客魂金川遺事忍重論誰從魚服悲宗國惟
有烏朝戀舊恩葉下沅湘愁北渚燕生鄢郢哭東門至今
松柏灘頭水嗚咽寒潮弔屈原

萬縣有感

千秋南浦地險阻控三巴惡少仍雕面通侯各建牙何人
飼豺虎吾道一龍蛇鼓角寒城暮江流捲白沙

秭歸夜泊

江水茫茫去西風感鬢絲峽深夔子國月上屈原祠灘響
夜方急猿聲寒更悲楚天搖落後何處采江蘼

過長沮桀溺耦耕處

曾讀陶公傳遼遼沮溺耦耕餘故跡流水抱寒岑鳥下日將夕雲歸山半陰從來避世者不厭入林深

輓姜貞毅先生

曾聞碧血裹朝衣滄海橫流萬事非生已變名吳市去死當埋骨敬亭歸空山落日鳴鷓鴣孤墓深春長蕨薇魂傍要離君愛弟英靈來往怒濤飛

通州水月菴三用清虛堂韻

鳬翁三五嬉晴沙殘僧閑關如退衙黃蘆苦竹隱缺岸水蒨往往飄殘花濠濮會心豈在遠便可泛宅仍浮家水關上接鮑邱水伯珪戰地唳寒鴉卓老一抔沒荆棘惟憐文采兼奇葩古人於此兩寂寞高枕且聽風鑪茶漕河如林

萬檣立負城時送迴颿
搥髣髴扁舟落吾手背癢欲倩鳥
爪爬病鶴觸籠翅翎短老隨雞鶩吁可嗟安得十洲縱汗
漫排空一氣凌雲霞

贈郝雪海侍御

龍性詎能馴依然七尺身誰從燎原日還憶徙薪人肝膽
酬明主風霜老逐臣孝陵松柏淚霑灑又重新
血戰蠶叢日愁雲壓閬中謗書翻置獄刀筆敢論功又失
巴西險何時劍外通憑君重草檄早爲破田戎

雜感

隴水洮雲外傳烽萬里通天兵張掖下露布朔方同賊已
亡方望時堪仗竇融明年看置酒圖畫滿南宮

飲馬洞庭闊連營笳吹聞南人知象主漢表失番君斑竹

祠邊水蒼梧野外雲何時真下瀨一試習流軍

戮力還羌帥孤忠有法王不緣蒙上賞何以警無將天狗
過秦野髦牛限鬼方古來稱隴蜀成敗幾蒼茫

一髮東甌路懸軍春復秋何人裹馬革幾輩爛羊頭禮比
長公主榮逾恩澤侯聖朝寬大德不死竟何憂

曹升六謝千仞攜酒過飲宋牧仲張杞園亦至同賦
長句

陵州羅酒玉雪清青州金露琥珀顏直沽冰開酒船到屬
車捆載連瓶罌二子提挈肯過我鴟夷交卧紛縱橫我愛
徐景山不知曹事惟酒鎗復愛謝安西玩弄元子如老兵
眼中況是我輩客談天炙轂聲彭觥一斗枯腸芒角生五
斗胸中鱗甲平一石曠若游八極逍遙齊物無虧成幽州

二月草始萌小桃照地如紅靺天涯酒人不易得何必琴
筑琵琶等十擲輒健詎緣拙三語作掾誰所令蠟炬成堆
冠幘墮西南月作金盃傾

昔聞馬文淵居後欲軒前欲輕又聞藥將軍賤貧辱身貴
快意此語非長者亦復非遊戲勁翮扶搖九萬里豈識青
冥更垂翅鳶肩火色多少年一老行吟獨憔悴惟應中山
釀供我千日醉馱馱爲載駝作糞有酒如澠那復記千秋
亭上相叫呼不知何與癡人事丈夫不得手執丈二殳身
領漁陽萬突騎親射蠻貊縛鬼章誰識鄧先好奇計此酒
須滿百斛船使我反覆沒飲如渴驥子路百榼堯千鍾黃
土誰能別愚智諸君不酺閣當閉舉解徑須煩杜蕢

曹正子邀同家兄子側及諸君豐臺看芍藥晚過祖

氏園亭

回首旗亭畫壁時重來已是十年遲
應劉逝後風流盡只有恆河照鬢絲

宮錦千絲費剪裁
說他婪尾殿春杯
老顛賸欲相料理
乞取齊奴步障來

霑溼春衣更不嫌
花枝姪姪雨廉纖
鬢絲禪榻心情改
閒看兒郎插帽簷

送姜西溟歸慈谿

春風滋百卉不榮孤柏根
白日迴陰崖霜雪慘不溫
丈夫重知己烈士輕感恩
姜生起句餘水擊南溟鯤
商歌一畝宮名動萬乘
尊孤高取眾忌當路誰攀援
季布揖曹邱感激由片言
何況貧賤士風飈阻重關
枚朔善骭跛莊徐擅

高論連尻結股腳詞賦若雲屯君獨銜恤歸秋風刈叢萱
虎鼠竟何常揮手聲暗吞

寄青浦丞李青立

麟趾異凡蹏鳳毛異凡羽君爲南陽孫豁達類其祖請從
復辟論卽事感今古神龍奮幽蟄天星落如雨倉皇奪門
功造次成肺腑興臺珥貂蟬政柄歸奄豎陳請濫恩澤帶
刀依負斧晉文定王室請隧不見許吁嗟彼何人憑藉亂
狐鼠爰立當危疑踪跡等羈旅當時武功伯脣齒終齟齬
公實仗忠信艱危成心膂嗚呼三楊後伯仲見伊吕天地
鬱風雲將相如龍虎愛君清門後克秉高曾矩低眉百寮
底手版趨公府青袍映春草遠向春中浦婦有林下風樂
事笑眉嫵詩寄雁南飛因風墮洲渚

形用卷言四卷二十一
送冰修歸海昌兼寄朱生

老下身將隱飛揚氣自雄游燕交馬客歸越事猿公仙飯
青精飢諸儒白虎通故人朱季在何處駕飛鴻

其年檢討見和綠雪之作復遺芥茶一器索賦

敬亭如靜女婉嫵有餘態洞山如道流吐納成沆瀣陽羨
連故鄣尻腫相負戴地靈草木異雲霧凝鸞黠尤重羅幘
名超軼絕流輩山氣夕陽佳風露非灌漑昨賦綠雪詩莽
鹵乏清裁名流遞賡唱粲若珠百琲髯也實致師拔戟成
一隊白甄題紅籤細君自蒸焙朝來肯送似秀色染眉黛
下簾候魚目芳盞露蟾背雖復遭水厄頗亦澆壘塊茶聲
正琤琤竹影交瑣碎詩成遺長鬚聊作三舍退君當賈餘
勇吾衰鼓已再

送邵子湘之登州

我聞大九州香海環其外裨海內絡之萬川勢交匯禹貢
周職方中央浮芥蒂鄒衍不可作疇與辨茫昧昔者始皇
帝東巡極海岱海神駕橋梁大魚射澎湃號爲秦東門刻
石表胸界三山在水下其事頗奇怪邵生列仙儒遠游信
所屆遙飛阜鄉鳥往撫天吳背龍躋凌丹崖九點煙凝黛
嶄絕日主祠夙與之果對日月影動搖島嶼光破碎朝潮
激天輪夕汐裂地肺巨鯨若連山奮鬣雲晝晦時見新羅
船墨點空青內廣乘渺何所歸墟誰負戴木張悉文雄髯
才更十倍歸來述滄溟始信九州大

和田綸霞郎中移居

田郎詩格如雪車昨來新句傳移家夢向漪亭坐秋水蒼

簣萬个眠麀麀冬官事少蹋壁卧日未卓午先放衙殘書
滿前自穿穴紛如雁字風中斜未要沈范相賞識風亭月
觀吟梅花廬如瓜牛足搖膝畢逋愛伴城頭鴉驚鳥累百
詎比數蹠蹠聊試終參撾牽蘿補屋絕代子慎莫無匹悲
炮媯

問鈍翁編修疾

先生方丈似山茨聞道維摩病起遲乍可心情同木石依
然談笑卻熊羆別裁僞體時流忌獨抱遺經後代知遙憶
玉堂清夜夢雪中花塢水邊籬

送張仲誠知資縣

不憚三巴遠高名萬乘知子規聲斷處山木雨來時囊有
涪州易園無魯相葵王衷諸弟子應習鹿鳴詩

東丹王射鹿圖

人馬勢逸不可當開圖素練生風霜奇哉落筆如挽強誰
其作者東丹王東樓西樓二千里乘秋出獵凌窮荒番部
紅韉鐵襖襠左射右射必疊雙鑿蹏驕馬如風檣三花翦
鬣紛怒張俊鶻初變爲正鴈蒼鷹塌翅隨馬韁雄狐狡兔
皆遁藏射麋麗龜走且僵東丹昔日稱人皇扶餘開國鄰
扶桑秋冬射獵海東磧頭驚燕罷傳醺漿跨海南歸大梁
苑時時夢憶穹廬鄉往往丹青自游戲寸縑尺素如琳琅
宣和壓架六千軸東丹九幅千金裝艮岳灰飛玉匣散此
圖豈不關興亡蠟炬如椽照空廊雄談劇飲累百觴東丹
丹青遠擅場蹊田奪牛語堂堂令人千載悲同光

送同年伊翁菴中丞巡撫雲南

金馬山前駐碧油，青蛉塞外陣雲收。
天威近已通諸賧，王會依然徧九州。
銅弩雨深諸葛壘，叢祠春賽潁川侯。
鐃歌鼓吹征蠻府，萬里昆明是壯游。

柏臺新命帝親除，重譯西南罷羽書。
雒將朱鳶皆內屬，越人黃屋竟何如。
賜來天廡飛龍馬，行避中丞赤棒車。
荒服祇今勞睿慮，要令絕域化耕鋤。

再送念東

錦湖秋色漾漣漪，湖裏游人歌竹枝。
斜日泊船紅蓼岸，神鴉飛過魯連祠。

長白山中跨白驢，偏提時挂小籃輿。
八騶朱雀航南路，可似先生薄笨車。

送毛斧季歸常熟

昆湖有眞隱金粟緬高風桑海遺民老襄陽耆舊空人言
虞仲里又得小毛公廿載淮南別吳江幾落楓

中秋後得富順范生嘉州帥生書知其陷賊不辱僞
命遂有是作

幾載豺狼橫巴蜀今朝書尺慰相思天彭井絡欣無恙伏
劍佯狂更不疑會見費貽徵合浦何妨甄濟動京師汝曹
識字知忠孝一笑南樓倒接籬

十一月十八日記事

招搖方指子七日後長至五星如連珠貞符協天瑞詖蕩
天門開日射觚稜次公卿儼行列百寮咸備位雲中露布
下琅琅動天地十月日在未軍府秉諮議雷動傳滇城十
萬連步騎貝子坐武帳諸道師總萃將軍拜被社偏裨怒

裂背搜穴剪狐鼠然犀照魑魅天上舞鉤梯地中鳴鼓吹
不遑濡馬褐況敢執象燧膽落鐘詎聞約長髮競繫半年
築長圍屏息門晝閉樵採路久絕啖食到殘醢斃技悔已
窮蟻援復何冀孺子一七殊僞相五刑備自然天助順豈
曰吾得歲昆明水清冷金馬山屬最妖氛一朝洗磨崖勒
文字釐主命召虎乘軒寵邴意六詔歌且舞給復置官吏
皇哉聖人德涵育及動植手提三尺劍削平諸僭僞何以
矧曰仁何以泮曰義所以八年中次第芟醜類師行不驛
騷民居不憔悴自茲萬斯年囊弓兵不試敢告載筆臣著
之大事記

和徐健菴宮贊喜吳漢槎入關之作

丁零絕塞鬢毛斑雪窖招魂再入關萬古窮荒生馬角幾

人樂府唱刀環天邊魑魅愁遷客江上尊鱸話故山太息
梅村今宿草不留老眼待君還

戴氏鼎

昔在京師賦方鼎年少筆力回千鈞焦山鼎圖歲在己江
海起立魚龍奔邇來衰謝二十載雖有意氣無由振戴氏
此鼎何處得勢如怪獸猶以蹲平頭負戴到蓬戶四座動
色誰敢捫雲雷盤旋間饗饗斑斑古色疑周秦凹中尾鬣
狀天馬緣尻鼯鼠拱且馴或云子午紀年月或如癸甲兼
庚申或云乾上艮在下天山爲逖理則均著馬履鼠古所
訓義云陰屈而陽伸制器尙象有深戒寡聞渺見徒紛紜
大巧坐令倕齟指流俗豈辨飼與饋丹楓閣中盡奇古此
鼎屹立何雄尊市邱鼎齟任嘲笑烹雞何以羞明神不煩

更問柳下季歷千萬世存吾真

多父敦

昨日賦罷天馬鼎今日復示古敦牟山川連日發光怪黃
白下覆雲油油此敦形製奇且古兩耳三足窮彫鏤上作
饗饗下蚩尤細辨非簋非彝舟古人一物殫工巧用盛黍
稷神所羞珠盤玉敦載盟府云以歆血親諸侯流傳千載
歷塵劫卻伴高士山之幽昭餘自昔稱晉藪侯甲水作青
瑤流丹楓孤閣踞其上朝霞暮靄臨窗浮先生靜坐觀眾
妙圖書萬卷皆親讎此鼎此敦置左右蒼然古色來商周
庭列九賓發緹幕令我一見生歎愀長安市兒寶康瓠金
敦玉敦知何求什襲歸去閉高閣會有光氣騰龍蚪

元祐黨籍碑

天津橋上嘯杜鵑耕父已見清泠淵宮中堯舜不可作厚
陵社飯悲年年二惇二蔡秉國軸同文館獄紛鉤連衣冠
相望走嶺表一網盡矣嗟羣賢司空手籍元祐黨大書深
刻相磨鏘彗星下掃文德殿毀碑夜半何喧闐攸攸狒狒
一兒戲可惜宋社成南遷潭州死骨尙有臭黨人名字光
中天西南荒徼入桂郡此碑千載人爭傳上云垂戒萬萬
世其詞何異誅共驩從來青蠅亂白黑三代遺直今如絃
小人勿用易所戒崇甯債轍無忘旃

題徐騎省集後

江左黃星事又新蕭蕭白髮入咸秦茂陵玉盃通天表未
信初明是恨人

寂寥小雪閒中過斑駁新霜鬢上加擁鼻微吟一惆悵殘

年風景又天涯

送黃方叔之官山海

翩翩黃叔度揖我向榆關半刺今爲政長城無限山扶餘
潮信外孤竹夕陽間重鎮當年地茫茫古戍間

過宣城館有感

暮天黃葉落一過西州門無復高人跡空聞宿鳥喧新阡
思挂劍舊館憶開尊南望澄江水誰招屈宋魂

二禺祠

軒轅二帝子聞住綠雲間世遠無遺跡夕陽空亂山攀髯
失弓劍采藥異荆蠻猿鳥青冥裏應悲去不還

歌舞岡

歌舞岡前輦路微昌華故苑想依稀劉郎去作降王長斜

日紅縣作絮飛

三峽橋

五里聞瀑聲轟若車千兩谿迴見飛梁穹若虹百丈眾流
會三峽峽門扼其吭建瓴沸驚湍排空削層嶂石激水斯
怒水橫石逾壯水石終古爭怪奇紛萬狀日射金井潭濺
沫出橋上日光散青紅雨絲亂飄颺絕景遇兩蘇何人繼
高唱

玉淵潭

已歷三峽橋更訪玉淵水水流大壑中路轉層松裏片石
橫百仞其右平如砥九十九飛瀑一門爭萬軌峇嶸直要
衝跳盪不得止雪浪如車輪凸凹忽奔駛激射爲深潭神
物潛尺咫夜黑風雨來鱣鮪皆避徙久立凜毛髮薄雲漏

餘暑西眺石人峯梵唄空中起

嶋磯靈澤夫人祠

霸氣江東久寂寥永安宮殿莽蕭蕭都將家國無窮恨分付潯陽上下潮

題查夏重蘆塘放鴨圖

鴨母船依湖水濱船頭長日飯龜蓴憑誰寄謝桓南郡不是鷺欄教鬪人

鴨頭丸帖種魚經盡日蘆碕泛渺冥何似漁陽隨突騎天風齊放海東青

米海岳研山歌爲朱竹垞翰林賦

海嶽研山不可見人間空說研山圖研山之圖亦遭煨燬雲煙過眼徒嗟吁宣和艮嶽已塵劫矧乃片石輕鎔銖永嘉

流落幾百載昭陵玉匣今亦無詎知神物有呵護星芒夜
隕三天都太平宰相盛文物寶此何啻千璫璫古藤書屋
花未放主人愛客招吾徒眼中突兀忽見此乍疑几席羅
衡巫壺中九華那足擬仇池枉用誇髯蘇三茅地肺互鉤
帶二華雲氣相縈紆蛟龍屈蟠待雷雨仙靈髣髴迴駢車
華蓋一峯獨秀拔宛插玉笏翹犀株翠蠻玉筍左右列雕
尻股腳相敲扶上洞下洞闕曲折潛通小有涵空虛龍池
幽窈驗雨候頗疑中有驪龍珠峯獨者蜀屬者嶧上泉有
埒下有瀆坐客摩挲三歎息蒼然古色生眉鬚海嶽之菴
書畫舫幾伴此老浮江湖巧偷豪奪厯千劫閱盡春秋如
蟋蟀翰林好事過顛米日餐蛾綠忘饑飢滄江夜夜虹貫
月莫令光怪驚菰蘆

郭有道墓

大槐坂上逐車塵
爭效先生折角巾
至竟清流解亡國
望門投止是何人

晚晴簃詩匯卷二十九終

晚晴簃詩匯卷三十目錄

王又旦

五十首

李念慈

十二首

鄭梁

十二首

毛際可

五首

晚晴綏詩匯卷三十

徐世昌

王又旦字幼華別字黃湄邵陽人順治戊戌進士由知

縣歷官戶科給事中有黃湄詩選

王阮亭曰幼華詩一變而清真古淡再變而為奇恣
雄放及歸龍門讀書太史公祠下而其詩益齋炫澄
深渺乎莫窺涯涘為新城歸省而都下之言詩者乃專歸
稱兩王先生一新城予告歸旋省而都下之言詩者乃專歸
事也其後新城予告歸旋省而都下之言詩者乃專歸
邵陽公生平與阮亭周旋最久故阮亭序先生詩曰
幼華之詩凡數變而予皆能道其所以然然公詩與
阮亭谿徑自別古體老而益肆外露奇崛而內涵靜
穆非學醇而功力深至不易
臻斯境界宜阮亭亟稱之也
詩話國初關中多詩人惟黃湄與孫豹人李子德如
泰華三峯俯視培塿而三家黃湄造詣為尤深才
大而無矜氣采振而無浮響其返虛入渾處雖豹
人子德不能不讓出一頭故漁洋之傾倒為獨至
自千尺幢抵雲臺峰作

清晨杖輕策入谷二十里傾崖驟合沓鉤梯紛相倚苔古
行蹤滅險艱從此始雲竇俯絕壑縹緲垂但繩繩攀縹踏危
石足頓不能起巖屋照頽陽曾岑倒松梓養力憩煙靄乃
知崎嶇美東南得高壁路隘不任趾亂峽無全天坤軸忽
崩圯太息展遠眺前途尙嶮嶮

蒼龍嶺

削壁突斷絕微徑始躋攀長虹馳遠影飛落青冥間迅飈
兩崖起獵獵雲氣還連峰若動搖我行亦孔艱天色撲蓮
花瑤草何嫋嫋陟危千萬慮曠望忽開顏璇宮應不遙從
此排天關

玉井

萬檜翳深景夕日風颼颼茫茫石礪外顯氣誰挽收蓮花

不復見一水入雲流

壤幹繫短纒灌莽生石路披草汲清冷冥然愜幽遇天風
入次寥坐看高下樹

大風雨自玉井歸西峰宿范湘濱道人復庵作

越嶂探玉井日照東林木雲氣生壁上須臾盪虛谷爽籟
激幽響大雨一何速羣帝忽徠下乘蹻紛相逐桂旗連寶
羽飄飄低以屬天色變多端一氣自迴複徒侶對面失苔
滑阻紆曲紛吾身何託暫憩雲中屋稍覺神魂安更曠登
臨目敞斜千山松偃臥一徑竹莫漫嗟險艱庶幾愜幽獨
入夜展道經孤鐙照人宿

下山

下山尋舊徑沈沈臨大壑亂石忽改觀煙景紛相錯低頭

追勝蹟背面惜林薄巖迴明星掩路轉石月落

明星峰名石月在東

上大河折東流波盪宏農郭萬古東西路世往事冥漠名岳如可畱吾欲齊龍蠖

雜興

華門槐蔭清野壠青茗柔荷鋤守舊轍貧家無外求孤雲歸空山山前澗水流平心愜微願選念亦自由紛吾涉塵鞅無端生百憂舉步皆谿壑念往多所尤譬之御駭駟一縱不得收慷慨欲置之反顧還夷猶

焦山

乘春歷江皋訪古浮玉山江風正蕩潏短櫂欲進難千里滯水國豈不增憂患隔岸見石屏忽使懷抱寬曲徑漸分明叢篁亦檀欒幽事供怡悅指點輕狂瀾勝遊難再得我

役何時聞

殺戇逐牂羊相傾無朝夕旌旆明江涯樓船何絡繹高士
臥空山閉門但自適至今三詔巖古木森千尺斥堠尙在
眼客子苦行役常懷歲時遷念此飢寒迫顏顏再稽首不
敢乞白石

孝然常以白石
與人煮之成芋

鹽官雜興

晨出步城南城南棧棧多莓苔昔人負高調在此延望但
見野木風號鳥毵毵成連何處尋爾師如何至今不知回
雲煙莽闊白日凍陰風常起伯牙臺千載尙有憑弔客山
徑時時騎馬來

金虎行

紆如城樓夜打鼓素月將中近金虎早起鼙鼓嵐結陰塢

然風吹鵲上林濛雨遲迴久不下欲斷欲續飄古瓦桑芋
摧折喚不醒滴瀝何能徧中野羣靈參差如連雞炎官氣
盛猶咄閤三月雷火久閉藏天威未遠還須假羣兒同聲
叫號屏須臾細注簷頭瀉我懷歲功惜已晚澤其枯矣寡
萌蘢

一貉行

山人朝獵得一貉換米一筥十日樂一貉可憐獲一筥百
貉成裘知幾許素絲細製光蒙戎堆牀照燿錦繡紅王孫
著來騎大馬霜飛雪下無寒風時易調移不稱意金羈縱
橫遭委棄朱門錯刀如流泉還憶山人始得年

牽纜詞

昂畢西橫夜猶暗官船催夫牽錦纜石尤風高霜滿河欲

行未行徒蹉跎天明前村雞下樹五里六里已爲多囊中
餽糧早已盡前途尙遠飢如何生來不合水邊住負檐欲
問山中路山家奉令獵黃鼬正是昨宵牽纜時

秋穫詞

吁嗟我生遇不淑結茅作舍露中宿年年種田食無粥腰
鎌入隴葉初黃可憐不待禾子熟官家百事無時休縣門
霹靂震不足西風匝地繁霜下畝稅力役相委屬君不見
貧人在官不顧私黃犢餓死那得知

擊厭詞

楊柳城頭光漸黑公家懸厭急漏刻繞城百轉天未明火
滅薪殘逗霜色防兵近駐江之潯醉擁金釵夜歌舞入市
打人知幾回長官不敢促收捕已聞剽劫如轉軸猶向東

郊射雞鶩朝來郵吏何恩忙帖下傳說軍無糧

河決

時久雨

襄樊一水東下潛高風吹浪何時恬百川之長背卑謙五月五日憂如惔二女擁珮手摻摻黑旗阜幢錦作幘乃與士德有猜嫌欺爾微弱較鈍銛大呼其類無巨纖獮獺鯨鯢鯢鯨三足六眸奉令嚴河伯破碣衣襜襜山崩厓圯意不厭若通項冥威勢兼乃使神蜃肆詖儉招屏翳遂遣飛廉望舒離虎警夜占長雲不斷雨霖霖十旬茫昧烏與蟾地軸坼裂如縞綾泣訴于帝乞光炎帝曰彼勢不可鉗奔逸不異馬脫柑郢南災禋日益添有田無歲無蒼蒹修築徒勞邑中黔五才遞用亦互殲嗚呼其苦在茅檐

懷楊樹滋山居

驛騎交馳地幽棲妝最閒解官仍白社避亂得青山路入
巖花曲亭深水竹斑年前風雨夜樽酒一開顏

茅舍連千嶂風林自一家晴窗交薜荔畫戶掩桃花紫塞
琬戈急黃塵戰鼓撾回看高臥處初日帶煙霞

選勝車箱谷經年只夢遊嶽蓮開對面渭樹接牀頭野鶴
遙相待山泉近可謀關河兵未罷飄蕩幾時休

贈梁峒樵水部

幾載常含畫省香知君例作水曹郎久辭請謁草侵戶近
著河渠書滿牀舊業六盤秦北地臣軀九尺漢東方那堪
塞上烽煙暗升斗朝朝問太倉

送陳說巖宮詹奉使祀北鎮

門闢銅龍侍從初春風遼海引簪裾雲霄日近融殘雪圭

幣壇高切太虛諸部常懷行在地詞臣正校職方書當年
大略猶堪問願上雄圖貯石渠

佳氣蔥蔥傍海生營州今是漢西京龍歸豐沛連朝飲火
照粉榆徹曉明舊事華封傳道路當時羽騎繞邊城振衣
直上高峰望大漠煙銷北斗橫

登東少梁山禹廟眺黃河歌呈同遊諸公

少梁山勢何嵒巖林煙漠漠風蕭颺典午祠堂一百丈此
山對峙相爭高客言禹廟登臨好空濛萬里無塵囂桑柘
刺眼槐花落來穿蘿徑同遊邀龍門直下五十里泰山晉
樹相周遭雲氣蒼茫看不見青天一豁奔驚濤七月暑退
蟬鳴號雨腳欲下風雷交鯨魚逞怒呼其曹兩河左右紛
動搖嗚呼戰伐經幾載木罌渡口橫弓刀昔自楚歸歲在

卯夜攜八口趨中條間道汾陰止河許欲披葭菼尋漁舸
隔岸人家聞吠犬望廬不到心徒勞一從朝那來效順甲
兵如雪都潛銷吾黨高臥飽閒散不妨老作韓山樵西來
涼氣入烏帽祇應飲酒持霜螯向夕客散不須約通林明
日還連鑣

太史祠隔河望孤山

絕巘連雲出秋風隔水多韓原中缺處山翠壓黃河
終日山頭坐看山興未闌秦山看不盡猶借晉山看

巍山頂上

陟巘得石林竦處如步障藉草肆遐矚勢挾秋雲壯初日
出大河空翠非一狀三嶺自北來羅列森儀仗遠色際高
天顥氣四奔放開山起何年鬼工勞意匠憶昔出城遊駐

馬看青嶂霽華靜松栝石角爭背向及此凌蒼崖深荷山
靈貺遙知道傍人視我煙霄上平生耽幽興冒險每攜杖
徘徊玩空曲題詩雜樵唱

古從軍詞和馬雲翎

離家從遠戍荷戈日已深野風起枯楊鳴雁多苦音潮沒
黃陵廟雪落雲夢林沮洳阻長驅萬馬空駸駸貳師不好
謀我力恐難任永捐父與母男兒豈無心

奉命移舊壘車徒發皋蘭四顧莽蕭蕭野氣蹙天寒萬竈
駐桃林男女雜旌竿紅粉隘大路馬上明綃紈昔日隨都
尉令嚴不遑餐一鼓斬女子勲名永不刊

秣馬臨清漳漳水咽不流兩河多綠草王程尙悠悠五日
視豆莖十日飭雕鏐月餘大蕃息惜哉時已邁戈鋌明落

日獵騎出長楸淹畱將奈何空與狐兔讎

橫山觀

身置煙霄上扶藜一叩肩雲流藏殿閣樹老斷青冥坐石
雙旌合看花數騎停誰憐棲遁處吹角不堪聽

登橫山絕頂

山窮得平野絕頂散牛羊垂柿低含雨高榆迴受霜舉頭
空碧落四面盡青蒼聲簌吹何處西風入夏陽

寄張帝臣時帝臣攜家住華山

他時賃畚似春農聊就青山策短筇直豁雲煙棲八口平
攜雞犬入三峰炎天樹尚畱殘雪靜夜人還伴怪松我去
關東空悵望城頭出沒碧芙蓉

渚宮

舊蹟何勞問東風草又新江薩春秣馬嘯鴉暮愁人白積
千秋骨青然幾夜燐那堪聽畫角腸斷是西津
夜宴出房烝軍城酒似澗陣雲通白帝邊月墮黃陵垂手
花低幕纏頭柳覆繒章臺歌舞地今古悵偏增

次漢口將歸武昌

雨後停橈古渡頭漢陽芳草自油油明鐙夜聚三江舸酒
旆春搖兩岸樓人去桃花猶有廟水沈鸚鵡尙名洲來朝
歷徧登臨處直破風濤下鄂州

登大別山同毛子霞朱悔人江非諾魏師聃

石路層城外空亭落照間導江傳禹貢對岸指吳關地坼
洲前樹天青雨後山招尋成久客楚月幾回彎

同朱悔人大雨渡江呈李鏡月

渡口煙初暝孤舟客未歸
楚天低遠岸江雨撼危磯
指顧千峰失空濛一葉飛
中流歎奇絕不敢怨霑衣

淮海人何在幽尋水一涯
到來雲徧野坐久樹棲鴉
雨腳妨山翠船頭破浪花
煙江如畫裏處處可爲家

磯上待月寄懷胡君信

雨後綠陰繁涼氣生七澤
遙念石莊人林間岸輕幘
缺月未離海殘霞忽斂夕
獨鶴下煙江渺渺楚天碧

村居

老樹濃陰水一方滿村槐柳間
青楊時平且縱花前酒地
僻能容醉後狂月夜休干
徐吏部貧星苦伴蔡中郎
鹽齏沒齒何妨飽剩領松風
入戶涼

廣陵使還得吳野人郝山漁汪長玉書

江廣思揚子年荒惜故人艱危誰計日喪亂各經春杜曲
看花眼潯陽乞食身十年中夜月兩地照清貧

野菜行

白草原頭日晡晚田父鋤田除野菜今年春到羈馬城麥
花不生菜花生野人儲無升斗米戶戶提筐采春薺也知
煮菜一飽難傷心且緩須臾死城中胥隸何披猖經過寶
馬爭輝光白酒黃雞不敢獻鞭箠嫚罵難遮防朝朝縣令
出廳事縣門仍掛恤民字上官不復采風謠許君原是循
良吏吁嗟乎野人偷生守蓬麻但願滿地麥花兼菜花

郊行感事

酒人愁腸恰半升東郊林下杖枯藤心隨夜半移枝鵲身
似門前飯粥僧綠樹飽酣山徑雨東風初泮大河冰獨憐

亭尉今皆醉不敢尋春過灞陵

送家叔季鴻先生遊睢上謁后土祠

綠楊連岸曉風斜東渡汾陰泛客槎天際兩崖馳竹箭春
流三月湧桃花黃雲寶鼎淪衰草絳氣靈壇落暮鴉舊事
於今何可問市樓沽酒是生涯

東風紫燕入叢祠河上人家記舊儀古砌半沈天上水蒼
松全折雨中枝依稀三燭流光夜想像千官立仗時獨喜
嘒鶯猶未歇看花一路到汾睢

玉果犀錢伴客醺此生投老恨空聞對人敢說青箱字隔
水徒漣白練裙三月扶筇登殿閣一天垂柳下河汾靈祠
颯颯如風馬應有神光入夜分

寄張枚公張時在保寧將軍幕中

莫歎花時別渭城知君幕府早成名
巴人久已歸圖版僕射由來類父兄
萬戶無煙猶轉粟三城有戍且休兵
憑君寄語征西將父老連年想太平

懷顧黃公

不畏窮愁只著書幽栖風物近何如
如斷雲疎雨吳王峴竹瓦臨江十尺廬

泊江口樹下寄周澹園

長川望不極渡口問吳艘白鶴起高樹
青山陰半江秋花垂屋角水荇落船窗
爲報南康好殷勤鯉一雙

亭上

坦步章邱上苔華處處斑青林紅幾葉
九月下黃鸝天坼禺東地潮吞海上山
故人家在此開卷對孱顏

宿花首臺

亂石夾奔湍我行隨意深選勝崎嶇間幽人多苦心雲墮
竹篙嶺流影松樹林蔥蘢翳山翠不知西日沈取徑行木
杪花宮在層岑細泉天上來苔階有清音夜氣湛虛明眞
源疑可尋冷然不成寐高風吹短襟

望水簾洞

老人峰下路亂瀑對清秋小憩雲中樹遙看石上流風聲
傳海嶠雨腳下循州從此捫蘿去青天倚二樓

沖虛觀

我尋鮑公履因之登翠微仙人不可見海燕西南飛灌木
蟠長根清樾當門扇洞中自昏晝日月安所歸巔岼四百
峰高下相因依元氣結重雲山雲漉相圍服食寧所願庶

形勝卷之三
免爲人戰徘徊暝色下冷露沾裳衣

招隱橋與周澹園

下馬玩密綠山靜聞激湍與子坐石橋風入青瑯玕是時

望鶴鳴

峰名

虧蔽松林端初日上左蠡氣勢高且寒古人恥

束帶鴻毛視一官遺徽傳今古忼慨誠爲難吾謂守不固
一出良足歎故里有名勝何事他盤桓金庭鬱參差雲氣
張綯紉他年著書畢直去驂青鸞

除日大雪登燕子磯

野梅香入寺門煙雪落亭皋正眇然敢恨新年羈水國誰
能元日看江天千尋翠壁迷僧舍三尺銀花擁畫船篋裏
紅囊茶尙在夜深活火手親煎

李念慈字屺瞻號劬庵涇陽人順治戊戌進士官天門

知縣康熙己未舉博學鴻詞有谷口山房集

錢牧齋曰秦人詩自李空同文太青莫不尤屬用壯
有車鄰駟鐵之遺聲配瞻獨不然行安節和一唱三
歎殆有蒹葭白露美人一方旨意未可謂之秦聲也
詩話配瞻詩絃而婉綽有絃外之音初官河間司李
漁洋懷人絕句云日華宮址蔓寒煙雅樂銷沈絕可
憐今日李郎行部去風流
家在大秦川兼以畫名

朱圉山

我過朱圉山山勢何縹緲丹崖卧橫紋十里行未了塞路
風沙集冰溪清渭繞雞犬叫雲中人家出樹杪天寒煙不
上道險壑方窈移神探古蹟流目矚去鳥海內多戰鬪河
西尙征勦苦爲行遲遲半是憂悄悄雲開西傾青日出伏
羌曉問奇懷胼胝尋幽披蘿薦因愛山中靜人世多紛擾

阿壩東山晚眺

騎馬到松岑萬綠渺無數況有一片月挂在西陵樹遙遙
陟寒坂披榛入廣霧亂山何纍纍陵谷相迴互黃河自天
來巨波東南注極目俯大荒風沙千里暮海內多戰伐邊
功競馳驚良馬千隊連士卒百金募聯營臥冰霜轉輪披
寒露殺傷不足論策名良已誤我來經戰地鬼火照寒素
黃羊走沙磧飢鷹啄狡兔連峯接渺茫落日邊風怒長林
振響籟空阿生深懼持觴弔往昔慷慨各相顧寄語嶺上
兒莫唱丁都護

登太華南峯絕頂謁上清宮還出四眺

衆山祖崑崙五嶽茲雄長峭壁出青雲巍然俯羣象高標
五千仞三峯石非兩絕羣迴獨尊赴天成孤往窈窕玉女
祠髣髴巨靈掌竭盡筋力能馴致青冥上短衣謁白帝問

源竚仙仗海雲東南生夕日下林莽偃仰天池側四顧愛
森爽學仙亦荒唐馳思聊自廣何當營茅茨灑然遺塵網
秦駐山觀海

秦皇并四海飛劍騁雄略窮極世上欲還希神仙藥長城
旣西築驪山亦東作鞏圖思萬世民生咸蕭索巨橋那可
成臨望心旁礪輜車載臭腐馳道空寂寞徒令鶴上人大
笑入寥廓

立春夜感懷

聞道花門信甘州今尙圍城分猶拒戰兵久未成歸刁斗
連邊動軍書入塞飛客懷無一可愁絕盼春暉

登浮山

絕頂憑誰引蒼藤乍可攀偶然臨福地不信在人間湖水

遙通艇江光日浸山東南百戰後登眺淚潺湲

雲

片片浮雲去愁人正望鄉東風吹汝急幾日到咸陽

松江舟中

松江過吳會一道得安流旭日輕鳥動和風細草抽近城
先見塔入市盡通舟柔艣春衫把吳娘倚柁樓

懷張少參商於

一官貧劇向商於萬里艱難事簿書直北家音新得否山
南羣盜近何如秋空劍氣張華宅夜色星文揚子居稍待
西風溪水落好將佳句付雙魚

春日莊浪看雪

蕭蕭風雪下千巒客裏相看淚不乾欲典羊裘沽好酒卻

愁明日又春寒

九曲亭

九曲亭猶好樊山縱馬曉人經赤壁水燕帶雪堂泥詞賦
名空擅川原草自萋潘生遺法在春釀過橋西

廣州除夜

屈指殘今日禁愁又一年已知過少壯不復惜嬋娟海色
連銅柱江春發木棉殊方累多口迢遞限山川

鄭梁字禹梅號寒村慈谿人順治戊戌進士改庶吉士
授戶部主事歷官高州知府有寒村集

阮芸臺曰寒村以曉行詩得名朱竹垞嘗贈以詩寒
村元孫簡香動以墨迹示余余和之有云別擬建堂
尊二老竹垞經義曉行詩簡香因建堂祀兩先生余
爲書二老堂額泰小峴觀察爲文記之又畫二老重
逢圖取竹垞別久重逢轉傾倒詩意

詩話寒村晚病風去官遂改名風少游黎洲之門文
有淵源詩亦近黎洲黎洲評其詩曰湍汰秋水表裏
霜雪推之甚至

晚村

一卷殘經對好風會心多在晚村中已憑溝澮汚流競自
覺煙雲色相空古墓敬傾耕犢上野橋低小釣航通年來
漸洗名根淨惟許前溪鷗鷺同

歸家卽事

暫得離城市歸家事轉清移花乘細雨播種急新晴浪暝
魚兒出煙濃杏子生村居無俗客隨意聽禽聲

夜泊燕子磯

燕子磯頭看月浪觀音閣上聽風蘆但知意思淩天表那
記形骸滯客途夜靜鐘聲鳴不斷江長帆影過如無何須

別羨元真子泛宅浮家作釣徒

畫長松呈黎洲先生

峩峩千丈松挺生藍溪側種自新建來根從蕺山出聳身
立雲表枝柯散八極衆芳仰廣蔭攀援各努力中有幽蘭
姿細草愧弱植瞻望徒慙慙高卑不相及松枝忽下垂一
朝承顏色何以報長松馨香保貞德

秋晚

斜陽平楚風煙亂新月遙村雞犬微好與鄰翁爭席罷其
如客邸帶愁歸疏螢暗落青苔井野火孤明白板扉多少
驚心榮辱事秋江擬付釣魚磯

登樓

久不登樓望江天別樣清朔風寒有色西日照多情木落

山餘骨村空水作聲倚窗看未倦林月一輪明

婁莊曉行

不知長夜不知冬棗堡榆莊走興濃疲馬單車十字路青
天明月五更鐘寒風自與嚴霜約清氣偏於瘦骨逢今日
京華肩準息卻嫌人事又環攻

郟城道上

村落無樹木鳥獸無羽毛江淮數百里彌望皆黃茅山行
入郟城始復見柯條棗色遠蒼鬱柳意寒蕭騷草屋枳籬
中犬聲時哢哢

江淮日雨雪入山天始晴灔然千里白照日增光明天無
片雲黑野無寸草青藐焉余一身有若纖塵停所以古達
人思與大化冥

病骨衰氣血瘦硬柴一把晨征霜露寒兩腳痛如剛踟躕
一興中羨殺蓬門寡雞塢茅屋上牛眠土牆下從容指行
人云是南來者

早發沐陽

立春早起沐陽程衾薄空興夢不成淺水無橋牽馬渡曉
星如月照人行

望夫石

萬劫難灰伉儷心舟中過客底愁侵倚門兩載嗟行役知
比岡頭望更深

毛際可字會侯號鶴舫遂安人順治戊戌進士授彰德
推官遷祥符知縣康熙己未舉博學鴻詞有松皋詩
選

詩話鶴舫治春秋著三傳考異與西河同宗西河晚
居虎林註易鶴舫集唐人句寄之日懶于街裏踏座
埃林下從留石上苔賢者是兄愚者弟早潮纔落晚
潮來門閒多有投詩客山翠遙添獻壽杯講易自傳
新註義懸知
獨有子雲才

渡黃河

晨興理輕策咫尺阻長河是時當伏秋激浪湧嵯峨中流
風怒號噓吸愁鯨鼉同侶皆動色將伯欲如何舟子談笑
餘顧視顏愈和揚帆復理楫枕席恬然過始知鎮定力可
以靖風波謀事苟若是經營豈在多

仙人沈香船歌

廬溪山頂

仙人鼓棹空中舉飛上重巖斟桂醕夜深沈醉墮巖前忘
卻仙舟在何處七尺寒玉凝紫脂沈香之號恐傳疑波間
似有蛟龍護月落澄潭霧起時至今陳迹已千載苔紋蘚

繡生幽采行人日日見仙舟
仙舟日日見行人改吁嗟乎化
工奇譎何所無儒生渺見徒驚呼
君不見昔人鑿井逢篙楫年月猶書吳赤烏

冬日游林慮觀珍珠簾

丹嶂何年剖懸流萬仞谿峯晴留古雪石怒抱寒霓小徑
攀藤滑危亭俯樹低天台差共擬翹首石城西

游上黃華寺

半日尋鐘至微茫路可求巖危如欲墜水緩不成流
草靜棲寒鹿林空集暮鳩白雲飛欲盡月上碧山頭

憩蘆溝橋寄洪昉思

九衢車馬地獨向此間行簿領年來事漁樵物外情
微雲浮遠岫曉漏度層城不信清霜苦君聽朔雁聲

晚晴移詩匯卷三十終